

ЛҮИМА СЭРИПОС

05 июня
2015 года
№11
(1101)

www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года

Лүпта этпос о́выл хōталэ
нйврамыт ўргалан хōталыг о́лы



Н. Меров барумхури

Ты хурит маньши а́ги Кристина Самбиндалова пōслым о́лы. Молты тал
Сысъя ватат пōслувес. Тав о́матэ е́т Турват павылт о́лы, а́гиришкве маньши
латнылсака ёмшакв потыртаңкве хасы.

Ты
номерт
ЛОВИНЬТЭН:

Савалап ма́ньлат
ма́хум о́лнэ
колыл мивет

4

Пуссын
щāгтым
рўпитасыт

6

Ма́ньлат
ма́ньщи
нэ́кве

10

Округув ма́гыс
ма́нки тэ́нут
та́стэв

12-13

Музейт ма́н
маттем та
мўйлысўв

16

ЛҲХХАЛЫТ

Ёмашакв рўпитан хўтпат халанылт кассыт

Касын тал Уральский федеральный округувт савсыр рўпата вярнэ махум «Славим человека труда» нампa касылыл вāрыглавет. Ты тал тамле эрнэ вāрмалыт ос рўпитас. Кāркамыт рўпитан махум халанылт ань 13 мāt савсыр щирыл кассыт.

Игорь Холманских, Россия Президент вāнын хум, нōх-патум хўтпатынтлаңкве Сургутүснēхталас. Тавокруг

губернаторув Наталья Комарован ты касыл магсыл яныг пўмашипа латын лāвыс. Тамле касыл таи магсыл ань щēпитāлаве, касын элумхōлас кāркамыт вос рўпиты.

Наталья Комарова тот акв йильпи тēла урыл потыртас. Тав лāвыс: «Ты тал мāн округувт сосаң махум пēs йис на-каныл элалыт тотнэ тāлыг намаяслўв. Ты кастыл тал сыс савсыр ялпын

хўталыт, ханищтапытос мōт эрнэ тēлат вāрыглэв.

Уральский федеральный округувт сосаң махум ос олэгыт. «Славим человека труда» нампa касылт ты ёмашакв рўпитан махум магсыл янас номинация ос вāрункве эри. Вōртур этпос 9 хўталэт нōх-патум мāщтыр махум вос янытлавет».

Мōтыт талныл кāркам хўтпат ты касылт йильпи номинациял вāравет.

Щар овлэт «Славим человека труда» нампa касыл Свердловский областыт 2011 талт вāрвес. Тувыл Уральский федеральный округувт олнэ махум тот касуңкве патсыт. Президент Владимир Путин 2013 талныл ты касыл Россия янытыл вāрыглаңкве лāвыс.

**Губернатор
пресс-службaтэ кетум
лҲххал мāныщи лātныл
Людмила ТЕТКИНА
хансытэ**



Ворщик хўтал

Мōт мāныщи махманув хўнтаң (кондинские) мāныщи глāвавет. Тāн хосат тāгыл щāнь лātңаныл ат вāганыл, пēs вāрмаляныл, пēs на-каныл пуссын хот-ёрувласаныл. Ос матрыг ань тыг мус тāн тамле ялпын хотал янытлэ-гыт, рущ лātңыл лāваве – День трясогузки, Ворщик хўтал.

Аман хоты пāсныл тāн ты ялпын хўтала-ныл янытлыяныл. Ос ань юи-ōвыл тāлыт сыс Ворщик хўтал округув янытыл янытлаңкв патвес. Ханты-Ман-

сийск ўст «Торум Маа» музейт касын тал лўпта этпос 1 хўталэтты ялпын хўтал вāрыглāлаве. Сāв нāврам тув атыглаве. Тāн тот ёнгёгыт, поргёгыт, халанылт касёгыт.

Ань ты ялпын хотал тот ос янытлавес. Мāхум нāвраманыл ёт тот мўйлысыт, ўщлахтасыт, пасаныл вāрыглавёсыт. Хотыют кāсащас, тав мāнь тōр-лōмтыл ўй-рищ вāрыс. Тох ты ўсувт сосаң нāврамыт янытлавёсыт.

**Валентина
ХОЗУМОВА**

Нāврамыт магсыл вāрыглым пўмаш



Мā янытыл нāврамыт янытлан хўтал олум пораттāн магсыланыл Ханты-Мансийск ўс янытыл сāв пўмаш вāрыглым олыс. Акв тамле пўмаш «Природы и Человека» нампa окружной музейт вāрыглавет. Та пўмаш ханищтахтын нāврамыт магсыл номылматвес. Овлэт тāн магсыланыл мāнь ханищтап олыс. Тот тāнанылн маныр, хўт, хунь ос хотытēрасыт хурит пōслымат, та урыл мōщ потыртавес. Та юи-пāлт мōт колнакн вāнттувёсыт. Тот ос пōслым хурит щēпитым олсыт. Мāн округувт тēрас ат олнэ щирыл пēs пāвыл колтёраныл нōх-хилнэ мāt хўнтым āнысупыт ос āныт лўвыл яктым савсыр порма-

сыт суссылтавёсыт. Тāн халаныт Хāлўс районт хўнтыт аньтыл вāрим консуп олыс.

Пормасыт сунсыгламаныл юи-пāлт нāврамыт ос пēs порат пōслым хурит савсыр оспа олпыл лап-пōслысаныл. Тув ёхта-лам нāврамытн пуссын пўмаш олыс. Тот рўпитан хўтпал акв-писыг матыр урыл титыглахтасыт, тувыл пēs пормас хумус ощвёсыт, та номтаныл тāнти потыртасаныл.

Ты суссылтап акв этпос тах рўпиты. Кāсащан махум, нас пўмаш магсыл тув ёхталэн, сунсыглахтэн.

**Александр
ВЫЮТКИН**

ЛҲХХАЛЫТ

Вит ўргалан ос сыстамтан урыл потыртасыт



Яңк нәтнә этпос вәт нупыл хәт щислат Ханты-Мансийскат яныг кўшаит ос мўй маҳум акван- атхатыгләлсыт ос тән я, тұр витыт урыл потыртасыт. Ты вәрмалъ "Современные проблемы охраны и использования водных объектов Югры: пути их решения" намаим олыс. Тав "Спаси и сохрани" ма-вит ўргалан тәла кастыл овылтавес.

Тув атхатам маҳум эт Наталья Комарова округ губернаторув па-шалахтас ос таи лавыс: "Мән ма-вит ўргалан акция-вәрмалъ ты овылтавлүв. Ты тәл тав "В капле воды - весь мир!" номтың ләтңыл намтыслүв. Мәнки пал-тув вит сыстамыг ошнә нак сака ўргалаңкве эри. Мән округув Обь-Иртышский бассейн тармыл олы, тыт сәв ят, тұрыт овёгыт. Югра мав Финляндия ма хурипаг олы".

Ань Финляндияныл мўй хәтпат ос ёхта-ласыт. Яри Салонен, «Пяйят-Хяме» коммуна союз кўшаиг оlnә хум, тәнки палта-ныл олум вәрмалит урыл потыртас: "Мән маҳумн айнә вит ўсувт сыстамтылүв. Айнә вит ўс ләпат оlnә тұрныл

выгүв. Вит сыстамтым мән лов арыгкем тәл рүпитәв ос таимәгыс емас ищхипың утыт оныщев. Та щирыл мән ма-витув ат пәңквты-лүв. Ты вәрмалит пүмшалан мәгыс нән кәсашегын ке, мән ак-ввёт рүпитаңкв вөрмев. Мән нәнәт нәтәв тах".

Тувыл маҳум элы-палт Югра ма-вит ўргалан кўшай Сергей Пикунов потыртас. Борис Ткачев, ЮГУт рүпитан профессор хум, ма-вит ос ят, тұр вит ёмшаквөг хаништан ос тәра-паттым сәвсыр вәрмалит урыл латың тотыс.

Акван-атхатам маҳум резолюция-нә пак щёпитасыт ос элалъ акввёт рүпитаңкве потыртахтасыт.

Тамара МЕРОВА

Пёрияпт рүпитан хәтпат янытлавесыт

Ювле хульгум этпос 28-29 хәталыгт Централь-ный избиркомт рүпитан хәтпат Ханты-Мансийск ўст хаништап щёпитәлсыт. Тәнт Россия янытыл пёрияп комиссият кўшай вәңын хум Леонид Григорьевич Ивлев ләххал тотнә колн вөвиньтәлвес. Тот тав нәпак тәратан рүпата урыл потыртас. Нән тав потре элалъ ловиньтәлын. Тав тох лавыс:

«Югра мāt семинарув кит хәтал минас. Ты хаништап мән тыт овыл щёс вәрыгласлүв. Хан-ты-Мансийск ўсн кит федеральный округы-ныл, Крым республи-каныл ос Севастополь ўсныл, Россия яны-тыл пуссын акввёт 24 субъектытныл пёриян вәрмалыт рүпитан маҳум тыг ёхталасыт.

Маҳум рүпатаныл хумус вәрияныл, тәнки

халанылты ты урыл по-тыртасыт ос ты ха-ништапт уртхатасыт. Эln оlnә маҳум эт рүпитаңкве ханиш-тахтасыт. Тыи мәгыс тән ма-вөй нөх-винә мән тотыглавёсыт. Пёрияп ёмтнә порат эln ўнлын павлытн, ёрнколытн, йис мән, хәт элумхөлас олы, тув та ялэгыт. Верто-лётыл щёскем мин-нә мәгыс тән яныгсәт

атпан сөтыра солкөви ойтэгыт, та яныт ты-ныл ты яласэгыт. Тән хосытаныл кәсың хәтпа кәтпоспинуңкве вөрми.

Ты тәл сүкыр этпост яныг пёрияп щёпитаве. Яныгсәткем сәвсыр кўшай пёрияңкве патаве. Тән халанылты 21 губернатор пёрияве, Ханты-Мансийский, Ямало-Ненецкий окру-гыт ос Тюменский об-ластныл оlnә хұрум губернатор мирн пёрияңкве ат патавет, тән Россия Президен-тын тув ўнттавет тах.

Югра мāt пёрияп ёмшаквөг вәрыглаве, ләпалахтын нак шар ат ёмталас, мән пал-тув нәматыр полщ тотнә нәпак ат ёхта-лас. Нән палтын пё-рияп кўшаиг Андрей Евгеньевич Павкин

олы. Тав ётә пуссын акввёт ловманкем сөтыра хәтпа рүпиты. Округ янытыл 22 районный миркол олы. Кәсың павылт, ўст пуссын акввёт 691 участковый пёрияп кол рүпиты. Маҳум кўпни-тыг кәтпос пинэгыт, нәпак тот тәратэгыт.

Тувыл 2016 тәлт вәт сәграпнал этпос овыл ўшлахтын хәталәт ос Государственный Ду-ман депутатыт пёрияңкве патавет, ос тах сәв рүпата ёмты».

Ты потре юи-пәлт Леонид Григорьевич округ кўшайн Наталья Комарован ос ты се-минар щёпитан мәгыс нәтмил вәрнә хәтпатн яныг пүмашипа латың лавыс.

Николай МЕРОВ

КҮЩАИТ РҮПАТАНЫЛ

Савалап манылат махум олнэ колыл мивет

Мощ мōлалнув образование ос наука Россия министерство палыл субсидия-олн тастувес. Ты олн-нётмил савалап нйврамыт олнэ колыл ёвтнэ магсыл миве.

Ань ты ёмас тēла кастыл яныг кўщаиг олнэ махум ты нэпаканылт катпосаныл постысаныл. Ты урыл округ кўщай нэ Наталья Комарова лавыс: «Савалап нйврамыт олнэ колыл ёвтнэ кастыл федеральный намба бюджет-олныл 41 миллион солкōви маим олнэ. Ман ань эрнэ савит олн оныщев, тан эрнэ щирыл холтункв эрегыт.»

Мирн нётмил вэрнэ департамент кўщай нэ Ирина Уварова ос тох лавыс: «Савалап нйврамыт олнэ колыл ёвтнэ магсыл округ бюджетныл 877 миллион солкōви майвес. Ты олныл 480 маньлат хотпа колыл ёвтавет. Округ янытыл пуссын аквёт 7 сотыра савит савалап нйврам олы. Ты тал сыс 480 маньлат хотпа колыл тах мивет.»

Округ кўщай пресс-службаныл тётым ляххал маньщи латңыл Александр ВЬЮТКИН хансыстэ

Мань павлыт олныл нётает

Мōлалнув Россия Правительстват заседание олнэ, 2015 талт мань павлыт нōх-вормалтан магыс ань олныл нётункве патавет. Ты вэрмал хосыт Югра ман 2 миллион солкōви миве. Ты программа 2014-2017 ос 2020 талыт мус рўпитаңкве паты. Тувыл 446 сотыра солкōви савит олн-нётмил кетаве.

Мавит ос несырьевой сектор экономика Департамент кўщай ваңын хум Алексей Киселев лавнэтэ щирыл, округ бюджетныл акв миллион солкōви савит грант-олныг миңкве патаве. Ты олныт павлың мат каснэ вэрмал, ўцлахтын вэрмал ос нйврамыт магыс ёнгилыт щёпитан кастыл тастувесыт.

Россия бюджетныл 1 миллион 700 сотыра солкōви мань павлыт олнэ махум коланыл хотщёпитан магыс кетаве. Маньлат щёмьят ос павылы рўпитаңкве ущты ёхтум хотпат ос нётункве патавет. 2015 талт ты тēла магыс округ бюджетныл 6 миллион 459 сотыра солкōви тастувес.

Ань Хальўс, Октябрьский, Нефтеюганский, Ханты-Мансийский ос Кондинский районт олнэ ат щёмьят ты олнытыл нётает тах.

Округ кўщай пресс-службатэ кетум ляххал маньщи латңыл Николай МЕРОВ хансыстэ.

Мощцаг хультум мирыт урыл потыртасыт

Москва ўст Государственный Думат яныг сапрани вэрыглавес. Тот та урыл кўщаит потыртасыт – мощцаг хультум мирыт магыс маныр сакконыт хансым олэгыт, хумус тан ўргалавет ос элалы маныр рўпата вэруңкв эри.

Яныг кўщаит потыртамыл юи-палт танти номтаныл пуссын акв нэпакн хассаныл. Ань ты нэпак Федеральное Собрание колн, РФ Правительство колн, савсыр яныг компаниятытн, организациятытн ос касың регионын тах тетаве. Тан ты нэпак щирыл рўпатамыл вос вэрияныл.

Лўимэ, Сибирь ос Дальний Восток ма янытыл олнэ мирыт Ассоциацияныл вэрнэ рўпататэ урыл лавсыт, тан мощцаг хультум мань мирыт магыс сав эрнэ рўпата вэрэгыт. Ос элалы аквтох ёмашакв вос рўпитэгыт.

Мощ мōлтынув ос Россия Президент Владимир Путин сав мир акван-атыглас. Тан тот потыртасыт, мощцаг хультум мирыт латңаныл хумус элалы тотункв эри, хумус ўргалаңкв эрегыт. Ос махум пуссын лавсанэ, тан латңыт элалы тотнэ магыс ёмашакв вос рўпитэгыт.

Ты ляххал маньщи латңыл Валентина ХОЗУМОВА хансыстэ.

Нйврамыт янытлавесыт



Яңк нэтнэ этпос 24 хоталэт Ханты-Мансийск ўст олнэ «Лылың союм» колт нйврамыт янытлавесыт. Тал палыт ань хотьютаныл маныр вэруңкве ханьщувлас, хумус ханищтахтас, ты урыл тот рўпитан хотпат потыртасыт. Тōва нйврамыт савсыр конкурсытыт нōх-патсыт, пуссын янытлан нэпакытыл майвесыт, сав ёмас, сымың латңытыл лаввесыт, эсгувесыт.

Тувыл нйврамыт ос тот рўпитан махум концерт суссылтасыт – маньщи ос ханты супыл масхатасыт, ййквсыт, сценкат суссылтасыт, саңквылтап таныт ёнгысыт. Тōваныл маньщи ос ханты латңыл стихотвореният ловиньтасыт. Ань ханищтахтан таланыл та оигпас, тыгыл элалы тот этпостем лагеряныл рўпитаңкве паты, хотьют касашас, наме тув хасвес. Ятил нйврамаквет, пуссын пустагыл олэн, Най-Отыранын вос ўргалавэн!

Светлана МАТВЕЕВА

КҮЩАИТ РҮПАТАНЫЛ

Арнтаг сав налог-олн атхатас

Округувт яныгсат ат хөтпа налог-олн ат ойтнэныл магыс мот хон ман тартуңке ат патавет. Югра мат тамле тәрвит вәрмалъ анъ ты олы. Сака сав хөтпа налог-олн государстван ат ойтэгыт. Округувт налог-олн пувнэ колт рупитан хөтпат лавнэныл щирыл, ты хосыт махум бюджетн сав олн арнтаг атсыт.

Ты тал яңк нәтнэ этпос овыл хөтал мус округувт

олнэ махум налоговый службан 1 миллиард 3 миллион солкөви ат ойтсыт. Щар сав олн яласан машина магыс махум ат ойтэгыт. Тән ты магыс пуссын аквэет 960 миллион олн ойтнэ щирыл олэгыт. Тувыл кол магыс 280 миллион, ёвтым ма магыс ос 80 миллион атхатас.

Ань Югра мат рупитан налог атнэ хөтпат такыщ ты тэлан вуйхатсыт. Олныт ат ойтнэ хөтпатныл

олнань пувуңке патаве. Хотьют хөнтаве, сутытаве. Тувыл сутыт рупитан приставыт ты олныт паттыи олтнэ колныл матыр пормас тыналан магыс хот тах выгыт.

Ань нила этпос сыс 105 хөтпа пуссынаквэет 21 миллион солкөви савсыр тэла щирыл ат ойтсыт. Ты хөтпатныл 63 элумхөлас яласан машина магыс 2 миллион арыгкем солкөви ойтнэ щирыл олэгыт. Төва

хөтпат ань 776 сөтыра солкөви ойтсыт.

Тыгыл элалъ ань налог атнэ хөтпат ат ойтхатнэ махум ўщлахтын хон ман таратаңке ат патыяныл. Ты коньпал тән акваг люкамтаңке патавет. Таимагыс махумакевет, нән налог-олн тэра ойтэн, юв ул пувелын.

Округ кўщай пресс-службат рупитан махум кетум ляххал маньши латныг Николай МЕРОВ хансыстэ.

Туп ўщлахтан тэла урыл потыр олыс

Яңк нәтнэ этпос 15 хөталэт ляххал тотнэ махум акван-вөвыглавэсыт, ныврамыт туй порат ўщлахтынэныл урыл потыр олыс. Тув ань щань-ащ тал яныгман ныврамыт ос савсыр нётмил мирн вәрнэ Департаментыт рупитан нэ Елена Владимировна Немчинова тав ёхталас. Нән ань элалъ тав потре ловиньтэлын.

- Мән школат ханищтахтан ныврамытн туй порат ўщлахтуңке нётэв. Округув янытыл ань 200 сөтыра мощ арыгнув ныврам школат ханищтахты. Ты туй 95% савитаныл ўщлахтуңкв вөрми. Төваныл щань-ащаныл ёт щәрщиң мән ялантэгыт, 120 сөтыра ныврам савсыр лагеритн ялантаңке патэгыт, 30 сөтыра ляпа ныврам щәрщиң мән тотыгла-

вет.

Ты туй ныврамыт ўщлахтынэныл кастыл арыг олн майвес – 16 миллион солкөви, пуссын аквэет ань 1 миллиард 16 миллион солкөви оныщев. Мән номсытэвт, ты туй мощ савнун ныврам ўщлахтан мән ялэгыт тах.

Тән яныгщ Сэмыл ос Азовский нампа щәрщ вәтан тотыглавет. Россия мав янытыл ос ўщлахтэгыт – Тюмен-



ский областът, Башкирия, яныгнув ныврамыт Нёрыт хосыт ўщлахтым яласэгыт. Ань ос төваныл Крым республикан ос Севастополь ўсн то-тавет – 2 сөтыра 700 савит ныврам. Молты тал тув 1 сөтыра 300 ныврам ялыс. Санаторно-курортный путёвкат ос оныщев, тув агмыңмосың ныврамыт оманыл ёт пусмалтахтуңке ялантэлэгыт. Ты тал тамле путёвкатыл ос мощ савнунев майвесүв – 1 сөтыра 426. Тән Алтайский крайн, Кавказские Минеральные Воды мән, Тюменский областын, Анапа ўсн ос Крым республикан кётыглавет.

Ёмашакв ханищтахтан ос савсыр конкурсыт нөх-патум ныврамыт элы-хон мән тотыгла-

вет тах – Болгариян, Венгриян. Мав-вөй нөхвинэ мат рупитан махум нывраманыл Англиян, Американ, Венгриян ос Грециян ўщлахтуңке тотыглавет.

Сав ныврам вөрың мат я ватат ўщлахтэгыт, парщин хасапыт (палаткат) хартэгыт, этпостем тот олэгыт. Ювле хуль-тум талт 39 тамле лагерь рупитас, ты тал 50 рупитаңке паты. Тот яныгщ латың ат хунтлын мәнлат махум тән ўщлахтэгыт. Лёккарыт лавнэныл щирыл, тамле ныврамыт вөрың мат олыманыл номтаныл мощ камнямёгыт, латың хунтлуңке патэгыт. Касың тал мак сав тамле лагерь Кондинский район янытыл вәрыглавет. Тувыл Нижневартовский, Ханты-Мансийский, Советский ос мот районыт янытыл олыгләлэгыт.

Ты туй манах ныврам ўщлахты, мән тах ты урыл таквсы порат ущ потыртэв. Ятил ныврамакевет, мәнлат хөтпат, ёмашакв ўщлахтэн, пустагыл олэн, сөтыңыщ яныгмөн.

Светлана ХОЗУМОВА



КҮЩАИТ РҮПАТАНЫЛ

Пуссын щагтым ййвыт ўнттысыт



Ювле хульгум этпос сака сав мўйлын хотал оныци – яныг хонт оиг-пас, нйврамыт хаништахтан мананыл пойтэгыт. Мощертын туи пора ёхты, махум янгыщ ўшлахтункве патэгыт, това хот-таль эл мины, билетыт ёвтуңкве эри та ма-ныр. Пуссын каркамыг ёмтапёгыт, хайтыл ялэгыт. Соль, сака рупатаң этпос. Ты ко-ныпал яңк нәтнэ этпост сымың махум акв сака ёмас тэла вәруңкве номылматсыт, на-маясаныл - «Лес Победы».

Касың тал ман Рос-сияв янытыл яңк нәтнэ этпост яныг хонт ка-стыл махум, янге-мане, ййвыт ўнттэгыт. Хотпа ёрвагыл ат кащилта-ве, хотьют рупитаңкве кәсащи, ййвыт ўнттын



ман ялы, Төрүм магыс тот мощ рупиты.

16 хоталт ман, редак-цият рупитан махум, тув ос ялсүв – Байба-лак намба посал ватан тотыглавесүв. Ань ты вәрмаль магыс ўльпа манос наңк ййвыт пи-томник намба колт янмалтавет, хус ман налыман сантиметр янытат. Тамле ййвыт тув ты ўнттысүв. Касың организация ййвыт ўнттын магыс янас маныл хўлтвес, вётрал, мантыл ос түлөвлың пәссал майвесүв. Я-ты, рупитаңкве та овылтахтасүв.

Татем хоталың хотал олыс. Сцена вәрыглавес. Овлэт Ханты-Ман-сийский район кұшай Пётр Захаров тав по-тыртас. Тув ёхталам хотпатн сав ёмас сымың латың, пұмашипа латың лавыс. Яныг хонт порат рупитам эква Анна Сте-пановна Шушунова мощ

потрамас. Тонт тав нё-лоловхуйплов тәлэ ущ төвлыс. Яныгхотпат ёт рупитас, нәйив хартыс, сәгрыс. Ханты эква Ма-рия Кузьминична Вол-дина махум янытласанэ, сымың латғыл лавсанэ.

Округ кұшай нә Ната-лья Владимировна Ко-марова тув ос ёхталас, наңк ййвыт ўнттыс, мир ёт потрамас, пөслахтас. Ляххал тотнэ махум таве маттем та пөслысаныл, китыгласаныл. Кұшай нә мощ потрамас, лавыс: «Ййвыт ўнттын тэла магыс ам ном-тум сака ёмас, ты ат-хунь эрнэ вәрмаль. Ворың мат ань ййвыт савмёгыт, хунь тах яныг ййвыг ёмтэгыт».

350сәвиттемхотпатот рупитасүв. Округуюяны-тыл 3 сотыра 500 арыг-кем хотпа рупитасыт, ўльпа ос наңк ййвыт ўнттысыт.

**Светлана
РОМБАНДЕЕВА**

ПЁС НАКЫТ ЭЛАЛЬ ТОТНЭ ТАЛ КАСТЫЛ

Мәщтыр мәхум ёнгын утыт вәрсыт

Яңк нәтнэ этпос оигпан элы-пәлт Хан-ты-Мансийск үст «Торум Маа» нампa музейт «Игры и игрушки обских угров» нампa ханищтап рӯпитас. Тамле эрнэ тәла кәсың тәл вәрыглаве ос округ янытыл өлнэ мәщтыр мәхум Ханты-Мансийск үст акван-атыглавет.

Ты тәл хөтхуйплов ханищтап рӯпитас. Акв тәлт мәхум сәвсыр анысаныт, совтыт, пәйпыт сас-ныл вәрсыт. Мөт тәлт мәщтыр хөтпат ос хул алышланмәгсыл сәвсыр хулпыт сагсыт, вөраян хөтпат мәгсыл ёсат ос мөт пормасыт вәрсыт.

Ты тәл рӯпитам семинарт өвыл хөталәт мәхум мәньщи ос хан-ты нәврамыт пёс порат манхурип ёнгын утыл ёнгасасыт ос хумус тән вәрсыт, та урыл потыртасыт. Учёный хөтпат ты вәрмалы урыл хан-сым докладаныл ловиньтасыт. Ты тәл Томск үсныл Ольга Михайловна Рындина ос Наталья Владимировна Золотарёва ты семинарн вөвиньтәлвесыг. Тән Томский университе-тыт рӯпитәг, мәньщи ос ханты пёс йис вәрмалит ханищтәг. Ханты-Мансийск үст тән соссаң мәхум пёс накыт урыл потыртасыг.

Акв та хөталәт «Игра-ми, игрушками играю-щие» нампa сусылтап

рӯпитанкве өвылтахтас. Музейт өлнэ аканит ос сәв мөт ёнгын утыт тот сусылтавёсыт.

Тувыл нила хөтал-сыс округ янытыл ёх-талам мәщтыр хөтпат



Аган пәвылныл Альби-на Лазаревна Ярсома-ва ёхталасыг. Округувт кәсың мәт мәньщит, хантыт акань тәнки щир-ыл ёнтыяныл. Тув ёх-талам мәхум сәвсыр аканит ёнтуңкве ха-нищтахтасыт.

Галина Рудольфов-на Кондина нәврамыт мәгсыл сәсныл мәнь апат ёнтуңкве ханищ-тас. Рудольф Васильевич Меров ос Хальүс район-ныл Хүрумпәвылныл тыгёхталас. Тавос Вале-рий Михайлович Шуль-гин, Ханты-Мансийск үст өлнэ мәщтыр хум, ёт мәнь ёса, сәлы сун, түп ос мөт ёнгын ут вәрсыт.

Яков Никифорович Тарлин Белоярский район Касум пәвылныл тыг вөвиньтәлвес. Тав ос сәвсыр пұмаш нәвра-мыт мәгсыл вәрыс.

Семинар оигпам юи-пәлт мәщтыр мәхум пуссын янытлавёсыт ос янытлан нәпакыл майвёсыт. Нәврамыт мәгсыл вәрим ёнгын утыт мәщтыр мәхум музейн мүйлуптаса-ныл. Ты пормасыт сәвсыр выставкат сусылтанкве тах па-тавет.



мәхум ёнтуңкве ма-нос мәщтырлаңкве ха-нищтасаныл. Вален-тина Дорофеевна Саратина ос Тамара Семёновна Мезенцева Ягрим пәвылныл тыг вөвиньтәлвесыг. Ма-рия Сергеевна Меров-ва Ханты-Мансийска-ныл өлыс. Октябрьский пәвылныл Галина Семё-новна Волдина ос Ниж-невартровский районл

Людмила
АЛГАДЬЕВА

СОССАҢ МИР ӨЛҮПСА

Агит-пыгыт ма-вит ўргалаңкве ханищтавет

«Спасти и сохранить» намба акция рўпитан порат нйврамыт мот хон маныл, Россияныл ос округ янытыл Ханты-Мансийск ўсн ёхталасыт. Тан пуссын «Одна планета – одно будущее!» намба форумт рўпитасыт. Агит-пыгыт Венгрия, Словения, Финляндия, Армения, Болгария ос мот хон маныл тыг вовиньтальвёсыт.

Форум рўпитае порат нйврамыт савсыр ханищтапыл, мастер-классыл, ёнгилыл вāрыглавёсыт. Хулюмсўнт павыл школаныл Юлия Боженко, Юлия Давыдова ос Татьяна Андреевна Головина, нйврам ханищтан хотпа, тыг ёхталасыт. Юлия Боженко «Водная экспедиция – Моя земля» такви потре тот ловиньтастэ.

Маньполь ётпост Татьяна Андреевна нйврамыт Усть-Манья павылн тотыгласанэ. Та павылн мус миным тан Няхщамволь, Яныгпавылн хойгласыт. Касың павылт тан ят вит ёт виссыт. Усть-Манья павылнлыт вит ос юв тотсыт.

Ювле ёхтыманыл Татьяна Андреевна Юлия Боженко ты вит ёмашакве ханищтастэн.



Ань щар пāнкын вит Хулюмсўнт павылт ови, я витэ савсыр лўль утыт оныщи. Савсыр мань яныл ос яңкылманыл, ураил вит Тагт ян паты, таи магсыл тасавит сав лўльутўлы. Усть-Манья павылт я витэ щар сыстам. Юлия ты вāрмалит урыл форумт ты потыр-тас.

Анумн лāвыс, тамле форумн тав ўвыл щёс ёхталас, тот рўпитаңкве тавён сака мўстыс. Ат хотал сыс тав ма-вит ўргалан урыл сав йильпи тэла хўлыс. Мотыт талт тамле форумн ёхталаңкве ос таңхи.

Людмила
ТАСМАНОВА

Мāн мāvн олмыгтам руц маҳум урыл

Ханты-Мансийский районт олнэ Кышик
Хпавыл ханты пāvлыг лāваве, тот йис тагыл ханты маҳум олэгыт. Тан тув Касум маныл олўнкв вāнтлысыт.

Пёс порат Назым я хосыт хантыт сāлың суныл Ханты-Мансийск ўсн хўл, нёвыль, савсыр мот тэнут хартсыт. Тот ўлтта лёңх пиным ўлы. Та пāsныл сав ханты щёмьят тот олўнкв хультсыт, ань ты мус яныгпала хотпат тот ханты лātңыл потыртэгыт. Рущит тув нас нйвлувёсыт. Тан мот маныл тыг тётыманыл юи-пāлт савсыр мань пāvлытн олмыгтаңкв лāvёсыт.

Кышикт ам акв руц эква ёт потыртасум. Тав наме Татьяна Васильевна Фатеева. Мён тав ётэ тўяг тот хонтхатыгласмён, тав такви рўпататэ урыл мощ потыртас. Тит

тāлыг ты ёмтыс, тав «Северяночка» намба клуб кўцаиг ўнттувес. Тув яныгпала хотпат ёхталэгыт, сāвыңпālэ руц экват. Пуссын аквўёт ань нёлолов хотпа, акван-атхатэгыт, та эргёгыт, матыр та щаквщёгыт – хотьют юнсхаты, хотьют саги. Ос пуссын эргўнкв сака хāсэгыт, турсуяныл татем суиңыт. Ты элы-пāлт тан мощ щирыл намаим олсыт.

Ты руц эква такви урыл тох потыртас. Тав Кышик пāvылт самын патыс. Щащёкватэ ос опатэ мот маныл олсўг. Яныг хонт элы-пāлт олўнкв тув тётвесўг. Колтагланыл сака яныг ўлыс, тэн он-



толов нйврам ўщсўг. Пуссын яныгмасыт, лāкква-мингаласыт.

Ос Татьяна Васильевна оматэ тот хуль-тыс, нила нйврамың нэг ўлыс. Ань ты нэ такви яныг щёмьяныг ёмтыс. Хўрум нйвраманэ пуссын Кышик пāvылт хуль-тсыт, акв мань пыге ань армият лусыты, мощёрт юв ёхты.

Татьяна Васильевна

атпан тālэ тўвлыс, такви сака кāркам хотпа. Яныгпāла экват пуссын акван-атсанэ, ань эргим-ййквим савсыр мāt та яласэгыт. Хоты пāvылн вōвавет, тув та минёгыт.

Мāщтырлым пормасаныл тыналыяныл, тох мощ олн сэлумтэгыт. Хот матыр ялпың хотал те вāраве, тот та тыналахтэгыт. Пāvланылт ялпың хоталыт олнэныл порат ос маттем та эргёгыт. Аквўёт эргиманыл ань хотхуйплов тāлыг ты ёмтыс.

Тох ты мот маныл ёхтум руц маҳум мань пāvылн ты олмыгтэгыт, мань мир халт тэлыгтахтэгыт ос танти эрганыл-ййкваныл мирн суссылтым та олэгыт.

Валентина
ВАСИЛЬЕВА

Юн маныщи латңыл потыртэн

Хальүс район Няхщамволь павылт маны ныврамыт садикт 2013 тал пасныл «Языковое гнездо» нампa проект рүпиты. Ныврам үргалан колт құцаит маныщи нэ Галина Николаевна Войтова ӧлы, такви опарищ наме Курикова.

Ты тӧла урыл тав лавыс: «Ты проект хосыт нывраманув маныщи латңыл потыртаңкве х а н и щ т ы н ӧ в . Няхщамволь маныщи павлыг ӧлы, тувыл ань махманув щань латңыл шар ат потыртӧгыт. Тыи магсыл ман ты вӧрмалъ хосыт рүпитаңкве тара кӧсащасӧв, агирищанув-пыгрищанув маны тӧгыл маныщи латңыл вос потыртӧгыт».

Ань Россия янытыл ӧлнэ финно-угорский мирыт ты проект щырил пуссын рүпитӧгыт. 2012 тал порат Галина Николаевна Саранск ӧсн ханищтапн ялыс, финно-угор махум ты рүпата хумус вӧрӧгыт, та урыл тот пӧмщалахтас. Ман округувт ань Хальүс район Саранпавыл ос Няхщамволь павлыгт ныврамыт маныщи латңыл ханищтавет. Тӧк ос Касум павлыгт агирищит-пыгрищит ос ханты латңыл садикт потыртӧгыт.

Няхщамвольт садикт «Сӧвыркве» нампa группа вӧрвес. Нина Николаевна Курикова ныврамыт маныщи латңыл ханищты-янӧ. Тав садикт 28 тал рүпиты. Ты ӧлы-пӧлт тав ат тал интернатт воспитателиг ӧлыс. Тонт яныгсат арыгкем ныврам маны павлыгтныл ос Хулумсӧнтыл тув тотыглавӧсыт. Та порат ӧвыл классын ӧхтум агирищит-пыгрищит руш латңыл шар ат потыртасыт. Ань тай мӧт щырил ӧмтыс, ныврамыт щань латың шар ат вӧгыт.

Маныщи нэ такви рүпататӧ урыл таи лавыс: «Ты тӧла садикт вӧруңкве хунь ӧвылтаслӧв, щӧнит-ӧщит китыгласанӧв, нывраманыл маныщи латңув ханищтаңкве патӧгыт ман ӧти. Махманув кӧсащасыт, ань ты группан нӧлолов ныврам яланты. Ман сӧт хӧтал сыс кит



щӧс акван-атхатыглӧв. Ам акв колнакт суссылтап щӧпитаслум. Тот сӧвсыр маныщи пормасыт акван-атсанум. Агирищит-пыгрищит тув ӧхталаңкве сака кӧсащӧгыт. Сӧвсырманы ӧсат, хӧпыт, совтыт, ӧканит ос сӧв мӧт пормас сунсыглаңкве сака ӧруптӧгыт. Тамле ханищтап ам ныврамыт ӧт маныщи латңыл потыртӧгум, тан тай

иң мӧнит, латың ӧмашакве хӧлӧгыт. Ӗмаснувег ӧлнув, щӧняныл-ӧщаныл юн маныщи латңыл ке потыртасыт. Акв порат ныврамытн пӧслым хӧл суссылтым, китыгласанум: «Анум маныщи латңыл лавӧн, тыи манхурип «хӧл»? Акв пыгрищ ювле рӧнхи: «Ам вӧглум, тыи нӧлк, анӧквaм тох лави». Яныг хӧтпа юн ӧлы, тыи магсыл пыгрищ сӧвнуv маныщи латың вӧг.

Нина Николаевна ныврам ӧт мӧйтыт, амщит, стихыт ханищты. Юван Шесталов хансум стиханӧ ос Анна Конькова мӧйтанӧ тананылн ловиньтыянӧ. Мӧлты тал тав Саранпавылн ялыс, ты проект хосыт махум хумус тот рүпитӧгыт, та урыл пӧмщалахтас.

Людмила
ТАСМАНОВА



Мāньлат ёмас нэкве

Хальёс район Саранпавылт
Хакв кәркам мāньлат мāньщи
аги олы, тав наме Анастасия Алби-
на. Наста мāнь тагыл Дмитрий Ге-
оргиевич Агеев палт ялантас. Тав
тот мāньщи йиквыт йиквуңкве,
эргуңкве, сәңквилтанкв ханищтах-
тас. «Салы лёңх» ныврамыт ёт савсыр
мāн ос ұсытн йиквыт, эргыт суссыл-
тым ялыс.

Касың тув Ясунт
павылн «Мāнь ўсквен»
ныврамыт ўщлахтын
мāt ўщлахтас. Юрт
агирищанэ ёт тāн тот
сака пұмащ олсыт.
Этипалаг ос рущ эргыт
гитарал сәңквилтым
аращ вātат эргысыт.

Школа асталме юи-
палт тав тара Ханты-
Мансийск ўсн мāнь
ныврамыт ёт рұпитан
нэг ханищтахтуңкв ми-
нас. Тув порат прак-
тикат рұпитан магсыл
такви павылн ялантас.
Ты ханищтахтын кол
асталме юи-палт тара
Саранпавылн олункв
минас. Тот хум вāрыс.
Ойкатэ ос мāньщи хотпа.

Тав ЖКХ мāt
яныг маши-
нал яласан ху-
мыг рұпиты.
Ўщлахтан по-
рат вораим ос
хұл алащлым
яласы.

Тән мāнь
аги оныщег,
агитән наме
Яна. Тав
ань мāнь
ныврамыт колн
яланты. Мōтантыг
ханищтахтуңкв мины.
Наста ань «Поиск» на-
па ДЮЦ-колт рұпиты,
тав палтылэ яласан
ныврамыт йиквуңкв ос
эргуңкв ханищтыанэ.

Тамле ёмас мāньлат



мāньщи хōтпагн ам
щунь-паша лāтың
тētэгум. Нāй-Отырн
щēmьятән вос ўргалаве,
сав тал пустагыл олункв
ос мāньщи вāрмалянув
элальтотуңквлāвиянув.

**Александр
ВЬЮТКИН**

Тав

Мōлалнув Санкт-
Петербург ўст
олмум порат ам Та-
тьяна Николаева
палт мўйлысум. Тав
ань Русский геогра-
фический общество
колт лāххалыт тот-
нэ тēлат ёт рұпиты.
Ты элы-палт Татья-
на Георгиевна матах-
мат тал Ханты-Ман-
сийск ўст олыс, ань
ам таве такви урёт
мощ потыртаңкве
вōвыслум. Тав лāвыс:

- Ам Нижневартовск
ўст самын патсум. Лов
класс тот асталасум ос
Ленинград ўст олнэ
А.И. Герцен намба ин-
ститутт рущ лāтың ос
литература учителяг
ханищтахтасум. 1992
талт юи-ōвыл курсыт
ханищтахтамум порат
мāн лўимā факульте-
тувн акв мўй хōтпа ёх-
талас. Ты француз ойка,
наме Жан Малори. Тав
мирн вāнэ полярник-
учёныйг олы, савсыр
потрыт хансы.

Тонт ойка инсти-
тут асталм лўимā агит-
пыгыт магыс Росси-
ят йильпи ханищтан
кол вāруңкве номыл-
матас. Тāн махум ёт
рұпитаңкв хāснэ хōтпаг
вос ханищтахтынувут,
савсыр сакконьт ём-
щаквег вос вāнувут,
эрнэ торыг тāнки
мāхманылн нētуңкве
вос вёрмынувут.

Тувыл, сōль, 1992
талт лўимā махум ха-
нищтан кол Ленинград
ўст вāрвес, өвлэт тав
«Полярный круг» со-
обществаг олыс, ётыл
тав Полярная Акаде-
мия намыл пинвес. Тот
Мурманск ўсныл хōтал
нэглын ёр мус савсыр

Кārкам аги

Виолетта Маметчина Хальёс рай-
он Няхщамвōль павылт олы. Ты
тал тав нēлолов класс асталас. Аги
школат сака ёмашакв ханищтахты.
Савсыр конференцият рұпитанэныл
порат доклад акваг щēпиты, ялпың
хōталытт мōт агит ёт ос эрги,
йикви.

Виолетта атятэ хатань хум, ома-
тэ ос мāньщи нэ. Анēкватэ Татьяна Се-
мёновна Тасманова Нёрахи павылт
олы. Виолетта мāнь тагыл туи по-
рат ўщлахтуңкве та павылн ялан-
ты. Анēкватэ таве мāньщи лātңыл
потыртаңкве ханищтытэ, ань аги
щāнь лāтың ёмашакве хұлы. Вио-
летта мāньщи пēs йис вāрмалитыл
сака пұмщалахты. Ты туи тав Ясунт
павылн «Мāнь Ўскве» ўщлахтын мāн
ялуңкве щēпитахты.

Людмила ТЕТКИНА



акваг номтың рұпата вәри



лұима мәныл студент хаништахтасыт. Ам ос тот хаништахтукве хультсум. Тонт группав янгы ылыс, ос мән, туп ват нупыл хот хотпа, Академия астылысүв.

Мән тот сака емас, номтың хотпатн хаништавесүв, товат ты үст ылыс, мотанат Францияныл ыхталасыт. Тән потрапыл хунтлуңке сака пұмшиг ылыс. 1994 талт мән Москва үсн образование ос савсыр мырыт тэланыл үргалан Министерство колн практикан кетыглавесүв. Ос Полярный Академия тармыл пуссын хоталь-ати рұпитаңке вуйлалвесүв. Ам тот ректорн нётнэ хотпаг рұпитасум.

Тувыл Санкт-Петербургский уни-

верситет аспирантурат хаништахтасум. Тот экономика ос финансы факультетт история пёс вәрмалит пұмшаласанум. Ос "Социально-экономическое развитие городов в зоне добычи нефти и газа. Проблемы их развития" диссертация хансуңке паттыгласум.

Ам тонт Тюменский архивт сав пёс нёпакыт ловиньтасанум, Нижневартовск ос Ханты-Мансийк үсыгт ылыс архив-колыгн ялсум. Аквтох соссаң махум тарвитың тэланыл магыс государство палыл нётавет ман ати, саккон щирыл үргалавет манос ати, ты тэлат тарапаттысанум.

Ётыл Россиявт тарвитың кризис талыт ылытахтасыт, ылулпсав

ос мот щирыл ёмтапас. Ос 1999 тал ам Академия палыл Ханты-Мансийск үсн приёмный комиссия рұпитаңке кетвёсум. Тот ам хаништап Департаментын рұпитаңке вөввёсум. Ам хоса ат номсахтасум, тара хультсум.

Ты элы-палт тасавит тал сыс сав номтың вәрмалитн хаништавёсум, ань ос амки мот махум хаништаңке, эрнэ торыг тананылн матыр нётмил вәруңке вөрмёгум. Тувыл ныврамыт йильпи щирыл хумус хаништаңке эрёгыт, ам та департаментыт кит тал рұпитасум. Тувыл Асугорский махум институтн рұпитаңке минасум. Номсысум, диссертациям элал хансылум, ос тах вуянтылум.

Ос округ Думат соссаң махум магыс Ассамблея вәруңке патсыт. Ам савсыр пёрияп вәрмалы щирыл округ янытыл яласасум, ханты ос мәнщи депутаты Ассамблеян пёрияп магыс латың вәрсум. Сав соссаң махмыт ёт тонт вайхатасум.

Та порат ты емас рұпатам кәсалавес ос Лұимә комитетн соссаң махум тэланыл ёт элал рұпитаңке вөввёсум. Ам ань тох номсёгум, ты комитет шар яныг миркол хольт лұимә махманув магыс ылыс. Тувыл нётым тән сыресыр тэлат, хаништап, культура вәрмалит нөхвөрмалтасыт.

Хул алышлан, вөраян хотпат танки пёс ылулпсаныл щирыл ылуңке патсыт.

Ос Ассамблеян пёриим депутатыт эрнэ сакконыт хансуңке ылытахтасыт.

Мот акв емас тэла - тыи ныврамыт магыс этностойбишат вәрвёсыт. Тот мән ныврамыт пёс махманув мұтраң ылулпсаныл хаништагыт. Ань тыг мус «Мән үске» ос «Нумсанг ёх» этностойбишан ныврамыт кәсашим ялантёгыт, матыр-ати вәңке, пұмшалаңке тув ёхталёгыт.

Та сыс ёмшаквёг үшлахтёгыт, танки халанылт юрщхатёгыт. Яныг пұмашипа латың тот рұпитан хотпатын ос ты тэлат элал тотнэ хотпагн лавуңке эри, тыи Любовь Павловна Станканован ос Ольга Александровна Кравченкан.

Аквтох ам Асугорский махум «Солнце» нампат театр урыл номсёгум. Тот рұпитан артистат пуссын этностойбишан ялым пёс накыт вәнэ хотпаг яныгмасыт. Мөлаалнув ам «И дольше века длится день» спектакляныл сунсылум, сака ёмшаквёг, номтыңыг вәрсаныв, агиттыгыт сэрёёрыг ёнгысыт. Пуссын тамле эрнэ тэлат нот палыт элал вос ылуныт, ёл нөмхотьютн ул вос пувавет.

Татьяна Николаева ань ты рұпататэ элал вәритэ, пұмаш ос эрнэ тэлат щёпиты. Тонт тән Владимир Путин РФ Президентув танки коланылн үрсаныл ос савсыр мырыт вәрмаланыл ылытыт потыртаңке щёпитахтасыт.

Тамара МЕРОВА

Округув магыс мѧнки тѧнут тѧстѧв

Яңк нѧтнѧ ѧтпос атхуйпловит хѧталѧт ам лѧххал тотнѧ мѧхум ѧт Сургутский район Белый Яр пѧвылн тотыглавѧсум. Та пѧвыл пѧхыт щиц-курекыт янмалтан ООО «Обь-регион» нампa пѧрма ѧнттым ѧлы. Та пѧрмат рѧпитан хѧтпат мѧнавн щицкурекыт янмалтан вѧрмалъ суссылтасыт. Хумус ты янас миннѧ тов мины, нѧн анъ агропромышленный комплекс кѧщай хум Евгений Петрович Платонов потре ѧлалъ ловиньтѧлын:

«Ты товлын ѧит янмалтан кол 2010 тѧлт пѧсвес. Сѧртын ѧс щиц-курек янмалтан пѧрма тот ѧлыс. Ос матыр вѧрмалъ щирыл вунъ-щалыг паттувес, таимѧгыс лап-пантвес. Ту-выл сѧрѧѧрын хѧтпат акван-хѧнтхатасыт, щицкурекыт янмалтан вѧрмалъ нѧх-вѧрмалтасаныл. Тѧнки олн тув пин-сыт, маныр ѧрыс, ѧвт-сыт ос рѧпитаңкве та ѧвылтахтасыт.

Анъ ты пѧрма округув магыс мѧңи ос нѧвиль лов процент сѧвиткем тоты. Ты накт мѧт хѧн мир ѧт вори-

тотнѧ магыс Росси-ян нѧматыр тѧнут ат тотаве, таимѧгыс анъ лапкaтт тѧнутыт тыныңнувѧг ѧмтсыт. Ос Сургутский районт тѧнки вѧрнѧ нѧвляныл ос мѧңи яныл тынтѧлнувѧг ѧлѧгыт. Та пѧрма хосыт шко-лат, пѧльницат ос мѧт сѧвсыр ѧрнѧ колыт ѧмас ос тынтѧлнув тѧнутыл анъ тѧставет.

Янас рѧпата ѧщнѧ хѧтпат ты вѧрмалъ тѧнки ѧранылт ѧлалъ тотуңкве вѧрмияныл кос, ос ты тѧла мѧсхал щирыл миннѧ магыс тѧн госудaрство пa-лыл ѧс олныл нѧтавет.



Округувт ты вѧрмалъ ѧлалъ тотнѧ магыс про-грамма рѧпиты. Пѧр-матн нѧтнѧ магыс кѧсың тѧл олн тѧставе. Мѧңи ос щѧквит магыс тувыл олн ойтаве. Мѧлты тѧл округ аны-тыл рѧпитан предпри-ятиятн ты тѧлан сѧтпан миллион солкѧви май-вес. Ты олныт пуссын ѧрнѧ щирыл холтвѧсыт.

Мѧн округувт пус-сын аквѧѧт 650 сѧвсыр пѧрма рѧпиты. Хан-ты-Мансийск ѧс пѧхыт Ярки пѧвылт мѧхум

рѧпата ѧлалъ тотнѧ магыс ѧстѧнки олнпин-сыт. Тот анъ витхѧрыг (огурец), помидор ос сѧюм-пум янмалтаве. Анъиңтув олн пинуңкве номсаве, мѧтѧ лов гектар мус яныгнѧвѧг вѧраве тах. Тот клубника пил ос мѧт сѧвсыр тѧлнѧ ут янмалтаңкве патаве.

Тувыл ос ты накт Белоярский районт щѧквит вѧрнѧ завод пѧсвес. Ты хосыт Бе-лоярский ос Октябрь-ский районыгт ѧлнѧ





мир йильпи шаквитыл ань таставет. Ты коньпал ань Советский районт ос шаквит таратан завод унттаве. Та завод тал сыс 425 сөтыра тонна шаквит вәрнэ щирыл олы.

Округ янытыл мәнки ты савит тәнүт вәрв: шаквит ос нёвиль - 7-10 процент, картёпка - 40 процент, хұл - 50 процент. Пёрман пиным олныт тара ювле ат ёхтёгыт, атахкем-сатахкем тал тақыш рүпитанкве эри. Тувыл ушта холтым олныт ювле ёхтёгыт ос элаль савмалтахтёгыт. Ты тәнүтыт махум акваг ёвтуңкве патьяныл, таимагыс пёрмавунышалыг ат ёмты.

Молты тал сыс танки рүпата ошнэ махумн нётнэ магыс округ бюджетныл 1

миллиард 400 миллион солкёви майлу-вес. Тан маныр тәнүт вәрыгласыт, таияныл ёмшакв тыналасаныл ос тыи магыс олныл ты нётвёсыт. Ты тал 900 миллион солкёви тастувес. Күшай лавыс, ат ке төвлавет, округ правительстван нэпак хансёгыт ос нётмил вөвёгыт тах.

Тувыл Надежда Петровна Мазалевич, птицефабрикат технологыг рүпитан нэ, потыртас. Тав лавыс:

«Мән щишкүрекыт янмалтан магыс мүнит Магнитогорск үсныл тыг тотыанүв. Молях яныгман щишкүрекыт, руш щирыл «бройлерыг» лававет. Тананыл янмалтан магыс Германия маңыл ишхипың тотапыт ёвтсүв, мүнит уйришиг

ёмтнэныл мус та тотапт оныщиянүв, акваг тыгле-тувле ёңхаталыанүв. Касың хөтахкем хөталтан уральтавет, тарвитаныл мансавитыг ёмтыс. Мүнит ёл ул вос ханасыт, төсамыг оныщиянүв. Хус арыг хөтал та ишхипың тотапт оныщавет, тувыл мән уйришит та нэглапёгыт. Актторыг ват сөтыракем маң уйриш самын паты.

Самын патнэныл юи-палт агмыл ул вос ёмтсыт, тан тэрпил расгалтавет. Тувыл хунь ёмшакв төсёгыт ос янмалтан колнакн тотавет. Уйришит ул вос пөльвёсыт, колнакт температуратэ акваг 34 градус савитыг оныщавет. Тан тот туп 38 хөтал олёгыт, яныг та ёмтапёгыт. Ты хөталыт сыс щишкүрекыт кит кила ос ниласат грамм мус тарвитаныл ёмты. Та юи-палт ос нёвлиг та варапавет. Тувыл та ма хотсыстамтаве, ос мотаныт янмалтаңкве тув тотавет. Щишкүрекыт тыттын магыс мән Тюмень үс нянь вәрнэ заводныл комбикорм ёвтэв. Тананыл люль тәнүтыл ат тыттыанүв, туп ёмас тәнүт тэгыт.

Ты пёрмат акв этпос сыс хўрмахкем манос нилахкем яныг щишкүрек аня нёвлиг варава, этпос сыс

вāтахкем тонна нёвиль таставе. Нёвлянув Сургут, Лянтор, Нефтеюганск, Пыть-Ях ўсыт ос Сургутский район янытыл тыналыанүв. Сургут ўст олнэ маң няврамыт колыт ос школат пуссын мән пёрмавт янмалтан нёвлитыл тастыанүв.

Тувыл ос тәнэ магыс мүнит тотнэ нэ щишкүрекыт ос олёгыт. Акв нэ-щишкүрек сатсат хөтал муңи тотым оныщавет, тувыл нёвлиг варава. Тав тал сыс хўрумсаткем мўни мыг».

Та пёрмат рүпитан махум касың тал «Дары Югры» нампавыставкан танки вāрум тәнүтаныл тотыглыяныл. Рүпатаныл магыс магылн тагатан пөсыл акваг янытлавет. Тувыл Белый Яр пāвылт рүпитан «Белоярочка» нампалапкат та предприятият янмалтан щишкүрек нёвлит, савсыр атың колбаса-тәнүтыт ос ань тыналавет. Ялпың хөталыт олыглам порат, мир та лāпка щар хот-татламтыяныл. Махум лāвнэныл щирыл, та пёрмат вāрум щишкүрек нёвлит сака атыңыт.



Нётнэ маснудыт суссылтавёсыт



Ханты-Мансийскат «Сделано на Родине» намба акв пұмаш проект суссылтавес. Тав мода центр - колт щёпитавес, тот кұщайг Елена Скакун ылы.

Ўст ылынэ махум «геология, нефтьосгаз музейин» акван-атыглавёсыт ос тот карс нётнэ агит

хорамың супыл масхатым тыгле-тувле ёмыгтасыт. Өвлёт «Млада» руш эргыт эргың

коллектив ты вәрмалы ывылтасаныл. Тән ос супаныл пұңкын пиннэ павлово-посадский тюрныл юнтым олсыт. Тувыл модель-агитхалт тот агмың-мосың, сакватахтам спортсмен нёт ос супыл мастувёсыт. Тыи Ольга Сергиенко, Маликат Магомедова, Ольга Касьянова. Ханты ос мәнъщи хансал юнтым супыт такем нётнэг олсыт. Акв костюм Руслан Проводников мағыс юнтвес, тав ос агит халт ёмыгтас.

Молал ты маснудыт Москват «Этно-Эрато» Евразийский касылт суссылтавёсыт. Тот ты мода центр-колув



«Этнические мотивы в современном костюме» номинацият ывыл места висыт.

Тамара САКВЪЯНЫЛ

Экваг-ойкаг щәгт тотэг



Хурит Светлана Андреевна ос Сергей Иванович Хунзи экваг-ойкаг пёслым ылэг. Тән Нижневартоск ўст ылэг, мөланув пенсиян патхатсыт. Ос тәла тәл тән ат ўнлантэг, акваг матыр-әти пұмыш вәрмалит вәруңкве номылматэг.

2013 тәлт тән «Хунзи» намба щёмьяң община вәрсыг. Экватэ хорамың маснудыт юнты, ыка хұл алышлы ос вөрай. Соссаң махум ышнэ ялпың хоталаныл мирн суссылтаңкве щёпитэг. Мәнъполь этпост «Славтэк» намба корпорация ёт акван-нётхатым тән хұл алышлан ос вөраян хотпат мағыс ялпың хотал вәрыгласыт. Тамле тәла «Сибирские увалы» ўшлахтан колт ылыс.

Тув Нижневартоск ўсныл ос Излучинск павылныл мүй махум ёхталасыт. Хунзи экваг-ойкаг маснудыт ос савсыр пормасыт ёмас суссылтапыг щёпитасаныл ос махум ханты пёс накытыл пұмшчаласаныл. Светлана Андреевна хұл исмит пайтыс, хұлың ос пылың нянъ вәрыс. Сергей Иванович янгүй кәтн-паттын вәрмалы урыл потыртас, сыресыр вөраян утыт суссылтас ос та урыл потыртас. Тувыл нётнэ турсуил ханты эрыг эргыс. Мүй махум сәлы суныл мош тотыглавёсыт, сыресыр касылыт ёнгысыт. Ты ялпың хотал тәнанылы сака мұстыс ос тән

ләвсыт, тамле вәрмалит ылалы вос тотнувыт. Ханты ос мәнъщи махум ывылтыт тән савнув вәңкве таңхёгыт.

Сергей ос Светлана Хунзи «Славтэк» корпорация А.А. Петерман кұщайн ос «Сибирские увалы» намба ўшлахтан кол С.П. Иванцов кұщайн пұмашипа ләтың кётэг. Ты хотпаг тәнәтән ялпың хотал вәруңкве олныл нётсыг ос махум тув мүйлуңкве вөвсыг. Ань ос мәнъ ныврамыт мағыс экваг-ойкаг вас янытлан ялпың хотал тот вәрэг. Тән ныврамыт ўргалан хотал кастыл аквтох сыресыр ёнгылыт, касылыт щёпитэг. Вас пут пайтэг, ўйхулыт урыл потыртэг, мөйтыт мөйтэг. Светлана Андреевна лавыс, тән апгён нила класс астылы, ань тав ётә хаништахтын ныврамыт остән оманыл-әтяныл ёт мүйлуңкве ёхтэгыт тах. Тамле вәрмалы тәнанылы ке мұсты, тән аквтох ылалы вәруңкве номсэг.

Тән ётән ам хоса потыртасум, ёмас сымың хотпаг ылулпатән пұмаш. Хотынакт потранән хансыянув тах.

Тамара МЕРОВА

Намхоталаныл кастыл янытлыянүв

Яңк нәтнэ этпост ос лүпта
Этпост ты хұрум соссаң
хотпат намхоталаныл ӧлыс.
Мән тән төвлүм тәланыл
мәгыс хот-щәгтым ӧлэв ос
тәнаныл янытлыянүв.

Егор Алексеевич Яркин вāt нупыл нёлоловит щислат 80 тәлэ төвлыс. Тав «ХМАО-Югры ветеран» хотпаг ӧлы. Ӗйка сāv тәл хұл алыщлым Октябрьский районт ӧлнэ Кеватнёл ос Алы Нярихумит пāvлыгт совхоз бригадирыг рӯпитас. Ёмашакв рӯпитама мәгыс сāvсыр эсгын нәпакыл ос пōсыл майлувес. Мән тавён яныг пӯмашипа ләтың ләвёв ос пустагыл ӧлнэ нак кётэв.

Ирина Кузьминична Фирсова вāt нупыл сāt щислат 50 тәлэ төвлыс. Ты нә Белоярский үст ӧлы ос сāvсыр мирыт культураныл элаль тотнэ центрит рӯпиты. Тав тот соссаң мәхманув ӧцнэ хорамың пормасыт вәри, нётнэ маснудыт юнты, щулкыныт саги. Нә ты тәланэ сака эрпыңыщ ӧныщиянэ, сāvсыр пормасыт мәщтырыг вәруңкве яныгпәла соссаң хотпаныл ханьщувлас. Ань ос мот мәнълат агит-пыгыт ханищты. Пуссын вәрум утанэ мәгыс Ирина



Кузьминична «Россия мәщтыр-хотпа» намыл пинвес.

Мария Владимировна Ситникова лүпта этпос китыт щислат 70 тәлэ төвлыс. Тав вāt нупыл кит тәл мир пусмалтан тәлат щирыл рӯпитас. Ос пенсиян патхатаме юипәлт мәнъщи маснудыт, сāvсыр пормасыт юнтункве патыс. Тав «Старый Сургут» наппа центрит соссаң мәхум культураныл үргалан ос элаль тотнэ хотпагруппиты. Ӗвыл вәрум рӯпататэ мәгыс Мария Владимировна сыресыр эсгын нәпакыл, мәгылт ӧцнэ пōсыл мүйлүпта-



вес. Ос юи-ӧвыл рӯпататэ мәгыс тав округ пәлыл «За развитите культуры малочисленных народов Севера» премиял майвес.

Ты ятил, ёмас хотпат мән пуссын намхоталаныл кастыл янытлыянүв. Сāv посуң, сōтың хотал элаль вос ӧлэгыт, тәнки сыманылн эрнэ тәланыл элаль вос вәрияныл ос нывраманылн, апганылн акваг вос эруптавет ос үргалавет. Пус кәт, пус ләгыл, Төрүм ёт, Нәй-Отыраныл ёт!

Тамара ХАТАНЕВА

Төрүм Ащ ләтңыт элаль тотнэ хотпат

Финка нә Анита Лааксо ёт мён хосат тәгыл вәйхатымён. Ам 1996 тәлт Финляндият ханищтахтамум порат тот акван-хонтхатасмён. Тав Хельсинки үст ӧлы ос Библия-нәпак толмашлан институт-колт кұщай нәг рӯпиты.

Ты институтт Библия-нәпакт хансым потрыт сāvсыр мирыт тәнки щән ләтңаныл щирыл хансыяныл. Ты тәлат вәрнәныл мәгыс тот сака ёмашакв рӯпитэгыт. Россия янытыл ӧлнэ сāvсыр мәхум ёт тән юрщхатым ӧлэгыт. Касың мир халт юрт ӧныщегыт ос тән этаныл акваёт потрыт щән ләтңанылн толмашлыяныл. Та сыс тәнки ӧс мән ләтңанув мощ ханищтыяныл.



Финно-угорский мирыт ос Санкт-Петербургыт лүимә институтт ханищтахтын мәхум тәнанылн вешкат нётэгыт.

Ань Санкт-Петербург үсн ялмум порат мён Анита Лааксо ёт акван-хонтхатыгласмён. Тав акваёт рӯпитан румаге ёт

В.С. Иванова намхоталэ кастыл янытлаңкве тув ёхталас. Валентина Селивёртовна тәнаңылы сака сāv ос мұсхалыг нётыс. Тав Клавдия Васильевна Афанасьева ёт Библия-нәпакн хансым потрыт мәнъщи ләтңыл толмашласанән.

Тувыл потрыт ёмшаквег уральтавет, ләтңыт мәкыг хултавет ос та юи-пәлт хорамың нәпакыг вәравет. Толмашлан хотпатн ос нәпак тәратан мәгыс финныт тәнки олн ойтэгыт. Та щирыл тән Төрүм Ащ ләвүм ләтңыт, пёс накыт мә янытыл ӧлнэ сāvсыр мирыт халт нот пәлытын ӧс элаль тотыяныл.

Тамара МЕРОВА


Музейт мән маттем та мүйлысүв

Ханты-Мансийск үст яңк нәтнә этпос
16 хоталәт Мә-вит ос Элумхолас музей
эткотиль мус рүпитас. Та порат Россия мав
яныгыл сав музейт тох рүпитасыт.

Мүйлын этипала тох намайлвес: «Солдатвойнуне выбирает». Музеин щалтсан магыс махум олнатоитсыт. Яныгхонт урыл выставкат ос экскурсият вәрыглавёсыт. Няврамыт магыс савсыр мастер-классыт олсыт. Тованыл пластилиныл тәнкыт ос товлыңхәпыл вәрсыт, тованыл ос катыл савсыр хурит пöслысыт. Кина суснә

колнакт махум кинал суссылтавёсыт. Уйхулыт ос товлыңуйит хурияныл нөх-вәримат – янгуй, охсар, щёпыр, аңха, щар сома лылыңтагыл люляхөлэгыт.

Музейт сака сав мир öлыс, кон ворил ты квәлсүв. Кон матәт ос савсыр машинат люльсыт, ань махманув хонтлуманыл порат манарыл яласасыт, ма-



нарыл пәтлуптасыт, тот пусын сунсуңкве рөвыс, махум маттем та пöслахтасыт. Пыгришит хонтлын вәрмалил вәрыглавёсыт – писалил майлувёсыт, патлуптым мощ хайтыгтасыт. «Солдатский привал» рүпитас, махум

кашал тыттувёсыт, щәилайтвёсыт. Концерт öлыс, яныг хонт урыл эргыт эргувёсыт. Сустёмт, кон турманлас, а миртоха та мүйлы. Аман хунь юв мингала-сыт, тавагт.

Светлана
МАТВЕЕВА



Лүимә сәрипос
(Северная зоря)
№11 (1101), 5.06.2015

Соучредители
 Дума, Правительство
 Ханты-Мансийского
 автономного округа – Югры
Издатель
 Департамент общественных
 и внешних связей Ханты-
 Мансийского автономного
 округа – Югры

Редакция
 Главный редактор –
Решетникова Р.Г.
 Телефон (3467)33-36-82

И.о. заместителя главного
 редактора – **Узель В.В.**
 Телефон (3467)33-23-09

Редакторы
Теткина Л.И., Мерова Т.С.
 Телефон (3467)33-23-09

Адрес редакции и издателя:
 628011, г.Ханты-Мансийск,
 ул.Комсомольская, 31
 тел./факс (3467)33-17-52
E-mail: luima@ugracom.ru
 Газета размещена на сайте
www.khanty-yasang.ru

Отпечатано:
 ОАО «Тюменский дом
 печати» г. Тюмень,
 ул. Осипенко, д. 81-220

Подписано в печать:
 по графику 3.06.2015 г.
 в 15.00.; фактически
 3.06.2015 г. в 15.00.
 Индексы **04399, 54399**
 Тираж **1750 экз.**
 Заказ **926**
 Цена свободная
 Мнение авторов
 публикаций не
 обязательно отражает
 точку зрения редакции.

Газета зарегистрирована
 Управлением Федеральной
 службы по надзору в сфере
 связи, информационных
 технологий и массовых
 коммуникаций по Тюменской
 области, ХМАО-Югре и
 ЯНАО.

Свидетельство о регистрации
 ПИ №ТУ
 72-00795 от 23 января 2013г.